

Nov center per requirents d'asil en il Meiersboden?

■ **(anr/fa) Per 7,7 milliuns francs duai vegnir construi en vischinanza da Cuira in center per l'emprima registraziun da requirents d'asil. Quel bajetg fiss dimensiunà per 180 persunas.** Per l'onn 2015 fa quint il Secretariat statal per migraziun cun 27 000 fin 31 000 dumondas d'asil en Svizra. Per il temp da procedura vegnan quels requirents scumpartids sin ils differents chantuns. L'onn passà eran en Grischun 607 requirents che spetgavan la decisiun davart lur dumonda d'asil. Il chantun Grischun dispona actualmain da 715 plazzas per requirents d'asil e per persunas che pon restar qua ad interim. D'atun 2017 vegn però serrà il center per l'emprima registraziun da requirents d'asil Foral a Cuira, da maniera che la capacitat chantunala vegn reducida per 180 letgs sin 535 plazzas. «Cunquai ch'ins fa vinavant quint cun bleras dumondas d'asil dovra il Grischun segirain in nov center cun lieu per 180 persunas», legian ins en la missiva correspundenta da la regenza.

«Agen center d'avantag en plirs regards»

Per pudair metter a disposiziun suffizientmain plazzas d'alloschi per ils requirents d'asil èn ils uffizis respunsabels «permanentmain en tschertga dad objects da locaziun adattads». Las experientschas ch'ins haja fatg ils ultims onns hajan mussà che la quantitat dad objects che sajan spert disponibels saja limitada. Ina difficultad cun prender a fit stabiliments è, ch'els na correspundan betg adi-

na a las prescripziuns da la polizia da fieu. «In dals avantatg da bajetgs ch'èn proprietad dal chantun è ch'els procuran en temps ch'ils fatgs d'asil sa midan spertmain per ina tscherta cuntinuitad», legian ins en la missiva. Quai pussibilitescha als uffizis chantunals la planisaziun en chaussa dimoras per requirents d'asil. «A lunga vista èn agens objects correspundents era la varianta pli bunmartgada», vegni infurmà.

Nov center duai esser en vischinanza a Cuira

Per esser datiers a las autoritads che mainan las proceduras d'asil èsi vegnì tschertgà per il nov center per l'emprima registraziun da requirents d'asil in lieu en vischinanza da Cuira. Quel han ins chattà en il Meiersboden. Qua posseda il chantun il center da scolaziun da l'uffizi da protecciun civila. Sin quel areal sin territori da la vischnanca da Churwalden, èsi lieu avunda era per in center per l'emprima registraziun da requirents d'asil cun piazza per 180 persunas. Il studi davart la realisabladad da quest center fatg dal 2012 ed actualisà l'onn passà è vegnì a la conclusiun ch'il project saja realisabel. Il plan d'investiziun prevesa per ils onns 2015 fin 2018 totalmain custs da 7,7 milliuns francs. Cun quel center, pront da stad 2017, vegn il chantun vinavant a pudair accumplir las pretensiuns federalas en connex cun ils fatgs d'asil. Oz vegn il parlament a tractar la proposta da la regenza da construir quest nov center a Meiersboden.